



Pissutsit immikkut ittut inuiaqatigiinnut kalaallinut immikkut pingaarutillit (Covid-19 pissutsit) pillugit Naalakkersuisut Siulittaasuanit nassuiaat.

(Naalakkersuisut Siulittaasuat)

Qularnanngitsumik nunarsuarmut tamarmut Corona-p siaruaassimanerata tamatta annilaartissimagunarpaatigut. Silarsuarput ullumikkut siornarniit allaanerujussuanngorsimavoq. Coronap ataatsimooqatigiittarnerput allanngortissimmagu, nunat tamarmik aningaasatigut minnerusumik annertunerusumilluunniit unammilligassaqalersimapput.

Nunatsinni unammilligassagut nunani allani aamma takussaapput, maanili qujanartumik iluanaarfeqarsimavugut.

Siullertut inuiaqatigiittut sukkasuumik iliuseqapallassimavugut, taamaammallu aattortissimasut ikittuaraannaasimapput. Aamma Corona peqqutigalugu toqusoqarsimanngilagut. Tamanna nuannaarutigisariaqarparput.

Aamma nuannaarutigisariaqarparput aningaasaatigut arlallit naalagaaffimmit, aammalu EU-mit suleqatigiinnissamat isumaqatigiissummit tapiissutaammata. Aningaasaatigut taakkua Corona-mit eqqungaasimanngillat.

Ajunngitsorta qaraluartorli isumaqanngilaq aningaasatigut ajutoorner-suup sukkasuumik siaruaattup eqqorsimanngikkaatigut. Takornariaqarneq massakut uninngalluinnarpoq. Aatsitassasiornermi sunnguamilluunniit susoqanngilaq. Nunarsuarmilu niuffannerup aalisakkanut qaleralinnullu akigititai appariartorput. Tamanna isumaqarpoq nunatta karsiata isertitassai missigersuutigineqarsimasunit annikinnerussasut.

Taamaattoqartillugu ajornannginnerpaassangunarpoq teqeqqumut ingilluni naammagittaalliorluni, allallu iliuseqarnissaat utaqqerujoorlugu. Demokraatini taamaattuunngilagut. Isumaqarpugummi unammilligassat tamarmik akisussaaffimmik tigusinikkut, suleruloornikkullu akiorneqarsinnaasut.

Tassa imatut paasillugu, massakkumut Naalakkersuisut partiillu akornatsinni ikiorsiissutissat il.il. aaqqissuunnissaannut suleqatigiissimavugut, taamaallilutalu inuinnarnut suliffeqarfinnullu ataasiakkaanut aningaasatigut kingunerisassaata ajutoortitsivallannginnissaa angusimavarput.

Massakkorpiaq nalorninartorsiorfimmippugut, sammisassallu marluusut nakkutigilluarnissaat pingaaruteqarluinnarpoq. Siullertut Coronap nunatsinnut apuutinnginnissaa sorsuutigisariaqarparput,



takkutissangaluarpallu siaruaatinnginnissaa qulakkeertariaqassuarput. Taamammallu nunatsinnut tikittut tamavimmik misissorneqartassapput. Immitsinnut ungasinniarnissarput ukkatarillugulu eqqiluisaarnissarput qaffasinnerpaaffimmitissavarput. Taassumallu saniatigut nunatta ammariartoqqinnissaa pingaaruteqarsoraarput, taamaalillutami sualummik takornarialerisut aallarteqqissinnaanissaat qulakkiissagatsigu. Danmarkimit Kangerlussuarmut timmisartukkut aqqutit, juunip aallaqqaataanit sapaatip akunneranut pingasoriarluni angallaviulertussaq kisiat eqqarsaatiginngilara. Island-imit Tunumut allanullu aqqutit aamma eqqarsaatigaakka, taamaaliornikkummi nunatta sineriaani takornarialerinerup aallarteqqinnissaa qulakkiissavarput.

Demokraatit tamatumuuna kajumissaarerusupput suliaqarfik taanna nakkutigilluarneqassammat, taamaalillutami peqqissutsitigut toqqissisimanariartornera malillugu sukkasuumik iliuseqapallassinnaangorniassagatta angallassinerrillu amerlanernit ammaqquissinnaangorlugit.

Inuiaqatigiinnili aningaasartuutigut aamma isiginiartariaqarpagut. Paasisariaqarparpullu pisarnitsuut aningaasartorsinnannginnatta. Inatsisartuni partiit akisussaassuseqarluta tamattaalluta erloqinartunik isummertariaqarpagut. Ajornartorsiornerput anigorniarlugu sipaarutininik nassaarniartariaqarpagut. Pisortat ingerlataanni allaffissornermut sipaarutaasinnaasunik nassaarniartariaqarpagut. Aningaasanut inatsimmi aningaasartuutit tamaviisa qimerloortariaqarpagut, aningaasartuutillu ataasiakkaat millisaavigisinnaanerigut imaluunniit peersinnaanerigut misissuiffigisariaqarpagut. Artornassaqaq, pisariaqarluinnarporli.

Taassumallu saniatigut inuiaqatigiinni pisisinnaassuseq ingerlaarnerlu ineriartortinneqarnissaat qulakkeertariaqarpavut. Piffissap ingerlanerata politikkikkullu isumaqatigiinniarnit takutikkumaarpaat qanoq iliussanersugut. Nunatsinnili innuttaasutut iliuseqarfigisinnaasagut arlaqarput.

Assersuutigiinnarlugu nunatsinni feriarsinnavugut. Taassuma kingunerissavaa nunatta iluani takornariaqarnerulernissarput, taamaalinikkullu Danmark-imi sumiiffinniluunniit allani aningaasaatigut atornagit nunatsinni atussavagut. Unnukkorsiuutissatut nunatta pissarititaanik pisinerusalersinnaavugut. Raajanik amerlanernik, aalisakkanik amerlanernik, umimmannik amerlanernik, tuttunik amerlanernik, savanillu amerlanernik pisinerusariaqarpagut. Taamaalioruttami aningaasarsiornerput aallartisaqqissavarput.

Tamatta isumaliutigisinnaavarput akulikinnerusumik nujaleritikkiartortarnissarput, neriartortarnissarput imaluunniit nerisassanik angerlaassassanik pisiniarnerunissarput, taamaalioruttami pisiniarfiit nunatsinniittut tapersersussavagut.

Ajornartorsiornerput ataatsimoorluta akisussaaffimmillu tigutigutta qaangersinnaavarput. Demokraatinit nukissaqartut tamaasa iliuitsit taakku marluk malinnissaannut kaammattorusuppagut.

Taamatut oqaaseqarluta nassuiaat tusaatissatut tiguarput.